

七十二家集

徐僕射集卷之六

陳東海徐陵孝穆著

明閩漳張燮紹和纂

書

爲陳武帝作相時與北齊廣陵城主書

籍甚英風常懷眷屬封疆有限寤寐增勞辱此  
月九日告深慰情佇方秋尚熱體中何如戎帳  
艱辛無乃爲弊吾以庸薄謬膺台鉉旣荷先帝  
拔擢之恩兼蒙今主責成之寄政以皇齊大德

世紹和風方籍威靈庶平讐耻提携小國願預  
藩臣還詔哀矜許垂容納奉勅須質便遣入朝  
部下諸將哀吾誠節一兒一弟無所遺慘立志  
立義無負上天但故丞相諸子及湛海珍等並  
依勅旨馳遣渡江主上又遣吏部尚書王通鴻  
臚卿謝岐等至和州與司馬行臺共爲盟誓而  
蕭軌等決信叛亡苟相陵易鬱從東道馳至北  
郊旣逼宮闈無容靜默兩兩相對俱有損傷彼  
聞人馬因此奔散且置兵之地溝澗且多退兵

之時投赴相積近遣張都來此具是行人所見  
但廣陵建業纔隔一江戰場去岸不盈五里軍  
人遐散理反家鄉緣岸村人復有舟楫且蘆荻  
荻筏竟浦浮江千百爲群前後相繼吾又勒兵  
按甲不聽討捕若無恐懼並應安遠假使在此  
不可更生至彼而殂嗟非吾過如其枉理必是  
興軍見伐於有道之人加兵於無罪之國若彼  
王師如此又是違盟后土皇天山川社稷察其  
怨語寧容相祐辱告承上黨殿下及匹婁領軍

應來江右師出無名此是何義小之事大差無  
違禮彼之陵我自是乖言玄天所伐匹馬無違  
翻見怨尤一何非理若彼鬼神有知寧可斯背  
鬼神無知何用盟歎去歲抑達摩等石頭天井  
連月亢陽三子纔降連冬大雪黃袍盡沒白帳  
皆浮旣因之以泥塗兼加之以疾疫蕭裴旣退  
雪霧便除從爾以來稍成災旱定知衣冠之國  
禮樂相承天道不言不容都減長江渺渺巨浪  
湯湯如鬪艦舟師詎有深利近梁山之戰卽是

前車蕪湖之役可爲明鏡昔晉侯不能乘鄭馬  
趙將不能用楚兵一非水土難爲騁力揚州卑  
濕厥土塗泥如遇秋霖杳同江漢假令蚩尤重  
出白起還生控代馬而陵波躡胡靴而湔水終  
難逞効詎有成功六州勇士雖有百萬十姓豪  
傑徒勞千億不能爲患斷可知矣昔我平世天  
下又安人不識於干戈時無聞於桴鼓故得兇  
人侯景濟我橫江天步中危實由忘戰自亂離  
已久人解用兵女子無愧於韓彭童兒不殊於

衛霍吳鉤甚利蜀甲旒輕槩動風霜弩穿金石  
高樓大艦槩日凌雲叱咤而起風雷吹噓如倒  
山嶽侯車騎國家重將分陝上流近隔以邊塵  
時虧表疏王途旣泰貢賦相望尋令子弟侍奉  
京邑蕭太保龍驤於賁海王儀同虎視於洞庭  
若望高峰便當投袂何則凡諸將帥各護家鄉  
非直吾人獨憂宗社日者頻辱司馬行臺及諸  
公有告裴行臺當今方邵此諸賢莫非英傑其  
餘軍士悉是驍雄庸蜀氐羌之兵烏丸白虜之

騎以此衆戰誰能禦之何爲比吾陪薄相懸何  
惡諸君身名俱滅來告以細柳之軍踰於灞上  
吾恐今之趙括不及廉頗也近張舍人至始奉  
嚴勅朝廷遣劉叔經仍往啓聞願達丹誠用停  
王赫伏計天慈理當懸照此身日月所鑒天地  
所明豈敢虛言欺妄宸極足下旣未知始末容  
有疑恠大軍多士希惠矜弘量非此失時騰表  
疏幸停師旅已存盟信庶其小國未申藩禮天  
心無爽邇遐一同投筆悚慨不復多白



爲陳武皇作相時與嶺南酋豪書

夫否終斯泰屯極則亨若日月之廻環猶陰陽  
之報復近者數鍾九厄王室中微聖主欽明還  
承寶運卽是高祖武皇帝之孫世祖元皇帝之  
子重光累聖胤國承家天下生民孰不歸德賊  
勃不涯踈戚希纂帝圖信是奸兇階茲禍亂自  
王宮再淪於醜逆虜馬四飲於江沱社稷沾危  
鑾輿幽辱勃身居列岳自御疆兵高視超超坐  
觀成敗旣而天維重綴國步還康翻畫凶圖更

謀神鼎且其兵馬之任資於長昆方牧之權由  
於奉聖操兄戈而斬姪藉國寵而弑君不忠不  
義莫斯爲甚比春初便遣大都督歐陽頎撫城  
主傳泰等兇徒數十遂到臨川吾奉承朝筭指  
畫戎略樊滕耿賈戮力爭驅天地靈祇水陸開  
道獲傳泰不勞於一箭擒歐陽無待於尺兵僞  
黨皆俘連城盡拔所收軍資不可稱算去月十  
六日德州刺史陳法武等願憤廻戈仍梟兇豎  
一夫挺劍傳首上京萬里澄清入神慶躍彼豪

門著姓典牧方州拘隔天朝亟離寒暑公私憤  
歎豈可爲懷今王道平夷理增懽忭朱明戒節  
比復何如軍士平安境內清謐吾以庸薄叨秉  
國鈞恒務牽纏諸有勞弊自天數云否朝禍薦  
臻東夏崩騰西京蕩覆身惟許國任在勤王宣  
力皇家靡有寧歲一還京師保持鴻業四驅夷  
狄奪得江左始則杜龕元惡張彪不恭據有泰  
稽連蹤巨震隨機討掩觸向平夷叛臣任約徐  
嗣徽等屢引齊虜前年末旣踐京師江畔邊城

皆爲戎戍賴貔貅力衛霍同心殲厥胡夷不  
日清殄去年將夏傾國大來鐵騎八千許匹甲  
士二十餘萬胡塵飛於北闕虜鼓震於南宮躬  
率偏裨聯與挑戰虜便土崩瓦解投險赴坑大  
小皆擒鯨鯢盡戮三江之上塞水無流千里之  
間伏屍相枕生獲大都督蕭軌裴英起東方老  
李希光王敬寶等虜中驍將惟此數人屢破關  
西之兵頻取淮右之地一朝俘斬無復孑遺遠  
邇敬欣華夷怖懼如聞彼虜稍是危亡尋命熊

熙欲就征討方可以雷行趙魏電掃幽并混一  
車書勢在朝暮而侯瑱跋扈江川公私阻絕卽  
平北賊仍事南征肉袒而縛歸首闕庭卽爲申  
聞優其禮秩臺儀不貶位遇兼常今所擒歐陽  
頴傳泰等莫不弘宥政爾授其兵馬處以榮祿  
坦然游狎無介懷抱年號武平國卽清晏君之  
聞此寧不欣躍但昔緣王事游踐貴鄉日想山  
川依然舊識吾旣忝荷朝私位逾台衮身持帝  
王之柄手握天下之圖故鄉如此誠爲衣繡故

人不見還同宵錦天涯藐藐地角悠悠言面無  
由但以情企今者王猷帝載化被無垠浮海窮  
山罔不咸格投竿負鼎馳步蒼龍崖穴丘園爭  
趨金馬君之才具信美登朝如戀本鄉不能游  
宦門中子弟望遣來儀當爲申聞各處榮祿深  
加將保念嗣音郵今遣某甲等使彼指此不多  
爲陳武帝與周宰相書

昔有天地便立帝王革昊惟農遷虞斯夏莫不  
三靈所祐五運相推梁德不造固天攸棄雖復

東漢之末區宇沸騰西晉之亡生民蕩覆未足  
以方其禍亂譬彼虔劉者也吾謬以庸薄屬當  
興運自昔登庸清諸百越徐聞浪泊靡不征行  
銀洞珠宮所在清乂自還麾南極代逆東都宣  
力驅馳亟淹寒暑六延梁社十剪彊寇黃帝與  
蚩尤七十戰魏祖在軍中三十年方厥劬勞未  
爲勤苦加以百神所感明靈應期萬里徂征虬  
龍表瑞於是中軍勇銳上將橫行承此休符遂  
興王業梁氏以天祿斯改期運永終欽若唐風

推其鼎命吾驚惶三讓拜手陳辭盈廷公卿稽  
顙敦徧眷言潁水徒抱素心尚想汾陽無因高  
蹈猥以庸薄遂膺天寵去月乙亥昇禮大壇言  
念遷徊但有慙愧昔賓門之始境外無交雖遣  
行人未申嘉好今上天有命光膺寶曆永興周  
室方同斷金我運惟新宜脩朝聘今遣侍中都  
官尚書周弘正銜使長安故指有白

爲陳主與周冢宰宇文護論邊境事書

國有三慶民有四安所謂通和是由鄰睦况周



陳欸好一紀于茲懷抱相期百世方遠灌瓜之  
美久勅邊吏拾橡之尤想應無忽梁氏以漸水  
東爲安湘小郡宜立巴州多歷年所此於荆部  
本包分界近得刺史符元舉啓稱蕭歸忽遣杜  
元茂神僧訓等將率人馬踰潰涉漸便置城隍  
謀爲侵軼適荷隣德合州見還不容今眷仍縱  
蕭氏元舉累移論及翻相河漢更往研問便騁  
鋒鏑彼軍人恃勇遂致俘擒聞此紛紜甚以驚  
歎其商奄餘孽才力甚微爲暴邊城良憑大國

但情均忌器不可加兵便勅軍司以禮相放且  
前歲所立疆城本以南平等五郡輸薦貴朝至  
如安湘旣屬巴郡幸承鄰惠無候涉言故下漸  
東惟如澧北政是標其大桶屬荊州之界耳彼  
此方申分好義絕規圖所貴惟和所重惟信夫  
以南平等郡地曠民豐雲夢之田楚王爲寶吳  
當勁蜀晉拒疆秦資彼山川並爲州鎮朕若棄  
其仁義務廣封域寧容延歲並貢周朝今者和  
親已固山岳而方謀尺寸之土用益兼葭之地

哉幸非竊疾相見鑒容江陵小寇旣爾虔劉前  
至之言或相誣罔一二因使人宇文平口具其  
懷耿耿故此相白

爲陳主答周主論和親書

使人使持節車騎大將軍儀同三司大都督治  
司城使主杜子暉中軍山遂伯使副鮑宏等至  
省告具懷夫聖君明辟司御兆民則天象地佇  
育黔首故張旌以往拭玉而來同在蒼生恢宏  
文武雖毀戈鑄戟末擬上皇散馬休牛載懷偃

伯非期與睦忽爽和風奚用殲師信由天討追  
尋曩好歎想兼懷言覲今書甫承家難知以冢  
宰執政擅同淵藪令尹當朝妄專征伐無君之  
譴俾墜其師無將之誅已從司寇刑名旣肅國  
步還康希篤親隣敬開衷款若二境交歡俱饗  
多福八荒期久良副所懷今遣其位某甲等使  
不復多述

在吏部尚書答諸求官人書

自古有吏部尚書者品藻人倫簡其才能尋其

門胄逐其少多量其官爵但古來數千年非無明時也非無明主也自有才用雖美階級不通門戶雖高官資殊屈若斯人者其例甚多請問諸君此是何義夫一千錢一斛米之多少猶關相祿况復皇朝官爵理係玄天內典謂之爲業外書稱之爲命五行有驛馬之言六甲有官鬼之說必令驛馬時發官鬼尅身所望偕榮便當果遂如其不爾決是難諧豈可改尚書作宮鬼驅老僕爲驛馬耶若見問尚書何不分判用與

不用許與不許僕答云君非屈滯豈可相期決  
言應果若今驛馬差爽便是乖信此關君命僕  
何以相容耶若朝散之流行止之屬門戶相似  
人才不殊選家斟酌無能爲爾若陟大位清官  
悉由玄命夫人君賓用並是前緣故宋文帝云  
人豈無運命每有好官缺輒憶羊玄保梁武帝  
云世間人言有目色我特不目色范曄自此而  
論豈非前業且世諺云圖官在亂世覓富在荒  
年梁孝元帝承侯景之凶荒王太尉接荊州之

禍敗爾時喪亂無復典章故使官方窮此紛雜  
自紹泰太平及未定中聖朝草創爾時州州自  
帝郡郡稱王天下干戈尚無條序兼以府庫空  
虛賞賜懸乏白銀之寶難得黃紙之板易營假  
以官榮代於錢絹義在撫綏無計多少又有非  
舊非勲非地非才託節將而求官因時人以買  
位賣官旣賤皆爲清顯故員外常侍路上比肩  
諮議叅軍市中無數四軍五校車載斗量豈是  
朝章應其如此今衣冠禮樂日富年華主上體

成王之風太傳弘周公之德西羗北狄畏我王  
威時旣清矣時旣平矣何可猶作亂世意而覓  
非分之官耶凡人所以稱屈滯者身已不無寸  
能官又不及父祖旣是明時可以於邑所見諸  
君多踰本分猶言太屈未喻高懷若問梁朝朱  
領軍等並爲卿相此不踰其本分耶此天子所  
用非關選序舊章秦有車府令趙高直爲丞相  
漢有高廟令田千秋亦爲丞相此復可爲例耶  
僕七十之歲朝思夕計並願與諸賢爲真善知



識曾無嫌隙差可周旋非欲令君作此怨訴但  
既忝衡流應須粉墨庶其允當無負朝寄耳去  
年疾患亦餘氣息不能相答通作此書所望諸  
賢深明鄙意徐君白

同前

自古吏部尚書者品藻人倫簡其才能尋其門  
胃逐其大小量其官爵梁元帝承侯景之凶荒  
王太尉接荊州之禍敗爾時喪亂無復興章故  
使官方窮此紛襍未定之時聖朝草創干戈未

息亦無條序府庫空虛賞賜懸乏白銀難得黃  
札易營權以官階代於錢絹義存撫接無計多  
少致令員外常侍路上比肩諮議叅軍市中無  
數豈是朝章應其如此今衣冠禮樂日當年華  
何可猶作舊意非理望也所見諸君多踰本分  
猶言大屈未喻高懷若問梁朝朱領軍昇亦爲  
卿相此不踰其本分邪此是天子所拔非關選  
序梁武帝云世間人言有目色我特不目色范  
曄宋文帝亦云人世豈無運命每有好官缺輒

憶牟玄保此則清階顯職不由選也秦有車府  
令趙高直至丞相漢有高廟令田千秋亦爲丞  
相此復可爲例耶旣忝衡流應須粉墨所望諸  
賢深明鄙意

答周處士書

辱去年三月二十七日告仰披華翰甚慰翹結  
承歸來天目得肆閒居差有弄玉之俱仙非無  
孟光之同隱優游俯仰極素女之經文升降盈  
虛盡軒皇之圖藝雖復考槃在阿不爲獨宿詎

勞金液唯飲玉泉比夫煑石紛紜終年不爛燒  
冊辛苦至老方成及其得道冥真何勞逸之相  
懸也又承有方生亦在天目理當仰稟明師總  
斯秘要豈如張陵弟子自墜高巖孫泰門人競  
投滄海何其樂乎聖朝虛心版築尚想丘園若  
彼能赴嘉招便當謹申高命但其人往歲亦望  
至京師觀此風神確乎難拔故以忘懷爵祿詎  
持犧牲之談高視公卿獨騁蜡蛭之訓所恐有  
道三辟公車十徵若斯者終當不屈此旣然矣

請復詳言昔楚國兩龔同時紆組漢陰二老相  
攜抱甕兄之幽貞若其鑿坯負石方同形影結  
綬彈冠無容越楚况乎糞土夔龍羶臊名器已  
所不欲非應及人忽承來音良以多惑何則頴  
陽巢父不曾令薦許由商洛園公未聞求徵綺  
季斯所未喻高懷而躊躇於矛楯也唯遲山阿  
近信更惠芳音如或誠言謹便聞奏第夙勞比  
劇不復多呈徐君白

周弘讓與徐陵薦方圓書附

吾荷朝恩得安丘壑身名兩泰夫復奚言但  
願沐浴堯風遨遊舜日安服飽食以送餘齒  
然性靈未能灰弭其間復須友生言晤後來  
英俊並出方爲時生林谷之中鮮逢遐逸惟  
趙郡方圓栖遲天日年過強仕不慕時榮文  
吏足用學藝優敏中歲暫游宛洛蒙弟識異  
其人方儲之胤衣冠未絕雅奉閑逸得性丘  
林與吾朋遊積有年歲今復同在巖壑畢志  
風雲琴按清商詩題空谷比幽貞道缺考槃

絕詠貴五履二兩爻無聞方今公旦作輔億  
兆攸賴激貪懲競儻自圓起弟以搜揚佐世  
水鏡求賢脫能登此仄陋綸言是屬翹弓遠  
賁則山谷咸勸足令廉風復振懦夫能立豈  
不弘哉圓若蒙此旌招未必不鑿坏而達於  
廊廟之用脫不能賁然來思而於退讓之道  
於斯爲賁恐弟未究東川人士聊復起予今  
言吾家上宰之貴無以微裨萬一此舉脫復  
入聽少得不負夙心周弘讓白

與章司空昭達書

君白日聖朝受命天下廓清所餘殘兇惟有歐  
紇南通交管北據衡疑兄弟叔侄盤阻川洞百  
越之費不供王府萬里之民不由國家明公受  
賑嚴冬持兵杪歲開冰踐露燭火宵行便屈舍  
淮乃其神速未騁三略非勞六奇薄交旗鼓仍  
平醜類自太清之末未定以來所闢疆界不過  
郡邑今茲赴捷二十餘州若較此功庸方茲英  
力漢之馬援不能爲擬吳之步騭故是相懸况



孫處宗之叛徒正槌盪主耳公私慶快豈可而  
言且僕一子屯窮妖徒所制五嶺遐憂存亡不  
測懸懷飲淚破膽復全蒙荷英恩保其身命餘  
年仰戴何力能勝今遣主師某馳往稱慶徐君  
呈

重答朝臣書

老病屬纊不能多說古人爭議多成怨府傳玄  
見尤於晉代王商取陷於漢朝謹自三緘敬同  
高命若萬一不死猶得展言庶與群賢更申揚

推

薦陸瓊書

新安王文學陸瓊見識優敏文史足用進居郎  
署歲月過淹左西椽缺允膺茲選階次小踰其  
屈滯已積

徐僕射集卷之七

陳東海徐陵孝穆著

明閩漳張爕紹和纂

書

報尹義尚書

別離二國雲雨十年心想河陽言銅爵而無遠  
神游漳水與金鳳而俱蜚北使還辱去冬十月  
十一日告忽同言叙循環巧制欣慰良深河朔  
年芳雖當淹晚白溝浼浼春流已清紫陌依依

長楊稍合體中何如豈無鄉思弟三秦世胄六  
輔良家文武兼能志懷開遠谷永之筆無慙古  
人益延之功高視前彥而淹留趙魏亟歷寒暄  
企望鄉關理多悲切聖朝欽明纂曆大拯生民  
戮巨海之奔鯨殲中原之封豕晉君之說長安  
遠於日邊揚雄有言交州在於天際則輸暉王  
府屈膝閭門川洞曾豪彊梁溟海神兵一指率  
土咸康方當偃伯於靈臺韜戈於武庫變大風  
於五禮驅蒸民於昌辰物色英聲搜揚俊傑投

竿負鼎馳步蒼龍巖穴丘園爭趨金馬而弟留  
河北義等周邵懷此姝才實可傷嗟吾崦嵫旣  
暮容鬢皤然風氣彌留砭藥無補追惟疇昔共  
備行人室家安危賓禮升降懸壺代哭俱歷春  
冬移館下箕同茲辛苦鳴蜩抱樹亟見藏冰歸  
雁銜蘆多經寒食靖言念此如何可忘握翫來  
書彌其承臉夫以擁腫之木得免因於不才骸  
觥之牛自保由其無用以余鄙陋未友龔生惟  
歎吾賢不同遽瑗耳若推溝拯溺每切皇衷逸

翮飄鱗見優機檻所以降尺一之書馳轡軒之  
使心期與國必遂還途寧謂親隣更成難請言  
尋雅告所及縲囚便訪鴻臚幸無淹使聞諸司  
寇或有邊俘前歲中流是維同惡燕禽望闕冀  
馬臨江裁頓雲羅自投天網京觀之塚宜彰武  
功周醜之門方申明罰而聖朝好生惡殺收雷  
寢電兵車所獲雖同長萬之來恩澤從容無異  
荀瑩之禮方之於弟况擬非倫伊昔梁朝共奉  
嘉聘張玆大帛處彼高閌庭奏歌鐘座延僑胙

賓客之叙方於昨階田獵之禽同於君膳正以  
鄉關阻亂致爾拘畱家國隆平義應旋反况復  
韓宣屢至宰孔頻還翻爾遲廻豈云隣睦弟遂  
鍾儀之操對此皇華高厚之詩一何非類關徐  
廉樂之况三戰七擒之言此日借子之矛攻子  
之室彼之使客猶尚不還此於齊都豪門貴戚  
周行匪例事義相懸豈與大弟同年而語吾本  
自凡流以復衰老稍近東岱不奢擊壤之年惟  
欣堯俗若耶之復長保安臥時思之

若耶至不  
此闕誤

棄忝亞宗卿非得侵官天展但當今芄芄在詠  
濟濟盈朝才冠卿雲智同荀郭文辭富於江海  
高論泊於雲霄趨走丹墀之門侍奉清規之內  
弟來欵言至欲附所聞聯類非宜更其多惑若  
使良有關二字猶希贈鯉之書郵驛方通復行蜚  
鶴之信執筆潛然不知何向

尹義尚與徐僕射陵書附

義尚白漳濱江涖眇若天涯去鴈歸鴻雲蜚  
難寄瞻言鄉國泣珠淚而盈懷寤寐德音仰



煙霞而疾首旣而暑往寒來愁雲滿塞河水  
自結非由漢后之軍艸霧怕嚴寧假公超之  
術霜飄虎踞距知朔野之寒雪覆龍岑徒憶  
清江之煖眷言疇昔邈矣遐哉係仰清顏願  
常豐勝雍容廊廟時宣匡奏之風偃息康莊  
無廢怡神之道義尚望國窮魂繁憂積歲雖  
其未殞豈曰生年日者謬忝後車陪游上國  
曾觀禮樂見季子之知音經奉侍言嗟鄭僑  
之博物如軍書愈疾之製碑文妙絕之詞猶

貴紙於鄴中尚傳聲於許下逮乎百六之年  
仍離再三之酷吉凶禮數綿歷歲時嘗膽茹  
辛備同艱險每冀穹蒼有感大國矜憫以禮  
言歸馭驛俱反何期毳毛湮淪墜灑漳濱之  
水逸翮摩霄輕託蓬萊之頂信知有幸無幸  
見死生之殊倫才與不才驗沈浮之異趣昔  
秦歸趙璧還得連城晉失楚材直亡其實自  
國祚中絕行李不通等避世於桃源同畱寓  
于仙嶺每瞻牛候馬想金陵之聖人今覩皇

華知有熊之建國賓堯仕舜猶是八才緯武  
經文方儔四貴幸甚昔楊朱岐路悲始末之  
長離蘇武河梁歎平生之未別雖復音塵可  
嗣終隔風雲夢想時通無因覲止依依望楚  
寸陰有待百年將半輕生若是命也如何今  
車書同軌行李相繼猥荷文移通賜論及輶  
軒旣以復命義尚未被哀矜竊以晉楚釋囚  
共成親好今乃拘彼求此不亦難乎夫以匹  
夫投分猶須坦蕩况兩國二君那宜細計彼

若才如廉樂猶恐不習禁兵苟非其人留之  
何益然三戰三敗卒成彊伯之功七縱七擒  
終仗天威之力由此言之彼此如耳徐元直  
西蜀之謀士關雲長劉氏之驍將須歸卽遣  
知叛弗追今之與古何其異趣且二國叶和  
長江共有如首如尾可以同規或貳或猜豈  
名唇齒是以隔河分歟君子知其不終衷甲  
尋盟春秋貶其行詐伏承聖上欽明英賢佐  
輔方知解網之氣用表無偏之化若彼之俘

虜猶且蒙歸此之南冠何辭不遣如其苟相  
猜貳信不由衷雖篤親隣義尚何罪不任辛  
酸之念輕陳萬一之情伏願仁人少存疇昔  
承閑之便希復開言昔張子餘年誠稱吳王  
之賜微躬邁影實仰含弘之仁載筆漣洏罔  
知所運

與李那書

籍甚清徽常懷虛眷山川緬邈河渭像於經星  
顧望風流長安遠於朝日青斐戒節白露爲霜

君子惟宜福履多豫雍容廊廟獻納便繁留使  
催書駐馬成檄車騎將軍賓客盈座丞相長史  
膽對有勞脫惠箋繒慰其翹想吾栖遲茂陵之  
下臥病漳水之濱迫以崦嵫難爲砭藥平生壯  
意竊愛篇章忽覲高文載懷勞佇此後殷儀同  
至止王人授館用阻班荆常在公筵敬析名作  
獲殷公所借陪駕終南入重陽閣詩及荊州大  
乘寺宜陽石像碑四首鏗鏘並奏能驚趙鞅之  
魂輝煥相華時瞬安豐之眼山澤晻靄松竹參

差若見三峻之峰依然四皓之廟甘泉鹵簿盡  
在清文扶風輦路悉陳華簡昔魏武虛帳韓王  
故臺自古文人皆爲詞賦未有登茲舊閣歎此  
幽宮標句清新發言哀斷豈止悲聞帝瑟泣望  
羊碑一詠歌梁之言便掩盈懷之淚至如披文  
相質意致縱橫才壯風雲義深淵海方今二乘  
斯悟同免化城六道知歸皆踰火宅宜陽之作  
特會幽衿所覩黃絹之詞彌懷白雲之頌但恨  
耆闇遠嶽擅特高峰開士羅浮康公懸溜不獲

銘茲雅頌耀彼幽巖循環省覽用忘饑渴握之  
不置恒如趙璧翫之不足同於玉枕京師長者  
好事才人爭造蓬門請觀高製軒車滿路如看  
太學之碑街巷相填無異華陰之市但豐城兩  
劍尚不俱來韓子雙環必希皆見莫以好龍無  
別木鴈可嗤載望瓊瑤因乏行李金風已勁玉  
質宜調書不盡言但聞爰繫徐陵頓首

李那答徐陵書附

繁霜應管能響豐山之鍾玄雲觸石又動流



泉之奏矧伊物候且或冥符况乃衿期相忘  
道術楚齊風馬吳會浮雲行李無因音塵不  
嗣殷御正銜命來歸嘉言累札江南橘茂薊  
北桑枯陰慘陽舒行止多福足下泰山竹箭  
浙水明珠海內風流江南獨步扶風計吏議  
析祥禽平陵孝廉辯訓文豹况復麗藻星鋪  
雕文錦繡風雲景物義盡緣情經綸憲章辭  
殫表奏久以京師紙貴天下家藏調移齊右  
之音韻改河西之俗豈直揚雲藻翰獨留千

金嗣宗文雅惟傳好事僕世傳經術才謝劉  
歆家有賜書學匪班嗣弱年有意頻愛雕蟲  
歲月三餘無忘肄業戶牖之間時安筆硯頤  
眉難巧學步非工恒經牧孺之譏屢被陳思  
之誚羞逢仲子類君山之鼓琴屢見子將同  
本初之車服不謂殷侯虛談成價遂同布鼓  
輕響雷門燕石空雕終慙比德楚軍雖拂實  
愧棲桐豈若邯鄲舉袖惟聞變曲協律飛塵  
必應不顧是以日南寶貝遙望歸秦合浦文

犀更希還漢芳春行獻鬻其鳴矣懸豫章之  
床置長安之驛厚築墻垣思逢鄭僑之聘工  
歌周頌佇奏延陵之樂書繒有復道意無伸  
李那頓首

與顧記室書

吾伏事天朝本非舊隸殿下殊恩遠垂薦拔故  
常戰戰慄慄甘心痛謹庶其愚老無負明據近  
者旣居臺轄唯務奉公去年正月十五日尚書  
官大朝元凱旣集丞郎肅然忽有陳慶之兒陳

暄者帽簪釘額條布裹頭虜袍通踝胡靴至膝  
直來郎座遍相排抱或坐或立且歌且詠吾卽  
呼舍吏責列不答而走反爲憾惠妾相陷辱至  
六月初遂作盲書便見誣謗聖朝明鑒悉知虛  
罔唯云吾取徐樞爲臺郎南司檢問了不窮推  
承訓劾爲信言致成隳免此事寃枉天下所無  
吾市徐樞宅爲錢四萬任入市估文券歷然不  
蒙申理見枉虛巧二者樞是故少府卿鱗之子  
鱗殞身侯景之役又爲西臺所贈兗州左衛官

位甚高未知其子何忝郎署魏晉之前如爲父  
遠宋齊以降其例甚多如徐愛阮佃夫之子可  
不得郎官耶紀文卿公向璉皆爲列棘豈冗雜  
曹郎乎三者樞入身梁朝解褐岳陽王小府墨  
曹承聖時爲故散帝晉安王諷席文墨具存陝  
西官爵乃多浮濫更補臺郎不爲勝擢未知何  
忽推宅貨官四者徐領軍節度自啓樞爲郎勅  
付選序吾既不啓據又不爲選職所可相關止  
是得中侯相聞爲呈啓而已以此見罪一何寃

濫吾昔在承華是弟所悉行年六十無復儕儔  
非意餘生忽此誣謗堯有驚於讒說孔將惑於  
拾塵雖復聖主機明不能悉照殿下德高兩獻  
風美二南億兆歸心衣冠有托久願通啓披訴  
聖明伏見軍戎多務所以不敢祈肩弟與吾遊  
眷亟廻星紀故人如此寧不矜歎耶侍言有便  
云何且爲啓聞一蒙神鑒照其枉直方歿幽泉  
無恨灰壤伏覲謁帝承明緒言多次服矜遺老  
曲賜湔濯則殿下前時妄澤匪復偏私遂吳良

延薦之恩無王丹所舉之謬吾得方辭武騎未  
附梁賓雖魏家丞庶呈秋實緣弟深眷故此敬  
憑干謁非宜益懷悚慨徐陵白

答族人梁東海太守長孺書

其人梁末  
入北齊

恩報近歲奉使來歸辱彼河清年中告行并惠  
以明鏡亟離寒暑雖復時陳梁鶴日照孫鸞言  
慰相思反增離眷劉傳三常侍還又承書札銀  
鈎甚麗玉疏依然開封伸紙破愁爲笑素秋方  
屆溽暑稍闌體中何如善保元吉藂臺之壁少

海之珠何必鄉里所在爲貴卿託身大國旣已  
積年彼朝英彥理相欽挹方當交辟三命清宦  
兩宮何乃濶然遲有問也吾七十之歲崦嵫已  
迫朽老之疾隨年而甚徒懷北邙之切未遂東  
都之期牽役承閒但有衰頓賢從君政佐佑興  
基中舍謚殿中並休宜自別有書問來告訪吾  
文章吾自歸來鄉國亟徙炎涼牽課疲朽不無  
辭製而應物隨時未曾編錄旣承今告輒復搜  
檢行人相繼別簡知音但旣乏新聲全同古樂



正恐多慙於協律致囑於文侯耳燕南趙北地  
角天涯言接未由但以潛歆善敬德中郎並比  
境之良選皇華之上求若可輶軒別當委白君  
問

諫仁山深法師罷道書

竊聞出家閉曠猶若虛空在俗籠樊比於牢獄  
非但經有明文亦自世間共見嘗聞法師覆彼  
舟航趣返緇衣之務此爲目下之英奇非久長  
之深計何以知然從苦入樂未知樂中之樂從

樂入苦方知苦中之苦弟子素與法師雖無曩  
舊相知已來亦復不疎夫良藥必自無甘忠諫  
者決乎逆耳倚見其僻是以不忍不言且三十  
年中造莫大之業如何一旦拾已成之功深爲  
可惜敬度高懷未解深意將非帷帳之策欲集  
劉侯形類臥龍擬求葛氏黃石兵法寧可再逢  
三併茅廬無由兩遇封爵五等惟見不逢中閣  
外門難朱易白鳴笳鳳管非有或聞儻女歌姬  
空勞反翫覓之者等若牛毛得之者譬猶牛角

以此之外何所窺審法師今若迴轉未必有一  
稱心交失現前十種大利何者佛法不簡細流  
入者則尊歸依則貴上不朝天子下不讓諸侯  
獨翫世間無爲自在其利一也身無執作之勞  
口餐香積之飯心不妻妾之務身飾芻摩之衣  
朝無踐境之憂夕不千里之苦俯仰優游寧不  
樂哉其利二也躬無任重居必方域白壁朱門  
聖然致敬夜琴晝瑟是自娛懷曉筆暮詩論情  
頓足其利三也假使棘生王路橋化長溝巷吏

門兒何因仰喚寸絹不輸官庫升米不進公倉  
庫部倉司豈須求及其利四也門前擾擾我且  
安眠巷裏云云余無驚色家休小大之調門停  
強弱之丁入出隨心往還自在其利五也出家  
無當之僧猶勝在俗之士假使心存殺戮手無  
斷命之愆密裏通情決勝灼然矯俗如斯煩惱  
萬倍勝於白衣一入愛河未沈無出其利六也  
聽鐘聲而致敬尋香馥以生心朝覲尊儀暮披  
寶軸刹那之善逐此而生水滴微功漸盈大器

未知因緣果報善惡皎然就此而言其利難陳  
矣假使達相白衣猶有埃塵之務縱令遙寄彈  
指遠近低頭形去心留身移意往閒有者得如  
此貧苦者永無因近在目前不言可見其利七  
也山間樹下故自難期枕石漱流實爲希有猶  
斯之類不可思議如此者難逢一心人稀遇法  
師未能不學交習聽勝之因一旦退心於理邈  
矣其利八也開織成之帙見過去之因摘琉璃  
之卷驗當來之果識因識果不以爲愆知福知

報何由作罪上無舟楫交見沒溺之悲下失浮  
囊則有沈身之患其利九也曠濟群品爲天人  
之師水陸空行皆所尊貴言必闡黎和上書輒  
致敬和南遠近嗟詠貴賤顙仰法師今必邊轉  
立成可驗纔脫袈裟逢人輒稱汝我始解偏袒  
姓名便亦可呼平交者故自不論下劣者亦恐  
不讓薄言稱已榻席懸異從來小得自在便以  
君爲題封若不屈膝歛手自達無因俯仰承迎  
未閑合度如此專專何由可與其利十也略言

十事空失此機其間深道寧容具述仰度仁者  
心居魔境爲魔所迷意附邪途受邪易性假使  
眉如細柳何足關懷頗似紅桃詎能長久同衾  
分枕猶有長信之悲坐臥忘時不免秋胡之怨  
洛川神女尚復不惑東阿世上班姬何關君事  
夫心者面焉若論繾綣則共氣共心一遇纏綿  
則連宵厭起法師未通返照安悟賣花未得他  
心那知彼意嗚呼桂樹遂爲豆火所焚可惜明  
珠乃受淤泥埋沒弟子今日橫諮必爲法師所

嗟世上白衣何嘗何限且一人邊道而不安危  
推此而言實成難解譬如瓦礫盈路人所不驚  
片子黃金萬夫息步正言法師入道之功已備  
染俗之法未加何異金搏赤銅銀換鉛錫可悲  
可惜猶可優量能忍難忍方知其最願棄俗事  
務息塵勞正念相應行志兩全薄加詳慮更可  
思惟悔之在前無勞後恨如弟子算遠卽十數  
年中央知惻惻近卽三五歲內空唱如何萬恨  
萬悲寧知遠及自誤自錯永棄一生乃知斷絃



可續情去難留或若火裏生花可稱希有迷人  
知逐去道不遙幸速推排急登正路法師非是  
無智遂爲愚者所迷類似阿難更爲魔之所嬈  
猶須承三寶之力制彼群凶豎般若之幢天魔  
自歎若此言旨當卽便冀棄芻蕘若不會高懷  
幸停深恠耳

與智顗書

陵和南昨預沈儀同法席餐奉甘露無畏之吼  
衆咸歸伏然正法炬朗諸未悟自慶餘年得逢

妙說尋事諮展此不申心謹和南

又

陵和南注仰之心難可敷具拔公至蒙三月二十日旨用慰積歲傾心麥冷體中何如願一日康勝山中春夏無餘障惱耳遲復存旨弟子二三年來溘然老至眼耳聾聞心氣昏塞故非復在人兼去歲第六兒夭喪痛苦成疾由未除愈適今月中又有哀故頻歲如此窮慮轉深自念餘生無復能幾無由禮接係仰何言敬重瑛公

今還白書不次弟子徐陵和南

又

陵和南放生星聞公家極相隨喜事是拔公口  
具謹不多諮惟遲拔公廷出數百里水全其命  
觀如此功德算數無盡隨喜無量此不委諮弟  
子徐陵和南

五願上智者禪師書

陵和南弟子思出樊籠無由羽化旣善根微弱  
冀願力莊嚴一願臨終正念成就二願不更地

徐僕射集

卷七

獄三途三願卽還人中不高不下處託生四願  
童真出家如法奉戒五願不墮流俗之僧憑此  
誓心以策西暮今書丹款仰乞證明陵和南

徐僕射集卷之八

陳東海徐陵孝穆著

明閩漳張爕紹和纂

序

玉臺新詠序

凌雲槩日由余之所未窺千門萬戶張衡之所  
曾賦周王璧臺之上漢帝金屋之中玉樹以珊  
瑚作枝珠簾以玳瑁爲柙其中有麗人焉其人  
也五陵豪族克選掖庭四姓良家馳名永巷亦

有潁川新市河澗觀津本號嬌娥曾名巧笑楚  
王宮內無不推其細腰魏國佳人俱言訝其纖  
手閱詩敦禮非直東隣之自媒婉約風流無異  
西施之被教弟兄協律自小學歌少長河陽由  
來能舞琵琶新曲無待石崇篴篥雜引非因曹  
植傳鼓瑟於楊家得吹簫於秦女至若寵聞長  
樂陳后知而不平畫出天仙閼氏覽而遙妬且  
如東隣巧笑來侍寢於更衣西子微顰將橫陳  
於甲帳陪游馭娑騁纖腰於結風長樂鴛鴦奏

新聲於度曲粧鳴蟬之薄鬢照墮馬之垂鬟反  
插金鈿橫抽寶樹南都石黛最發雙蛾北地燕  
脂偏開兩靨亦有嶺上仙童分丸魏帝腰中寶  
鳳授曆軒轅金星與婺女爭華麝月共嫦娥競  
爽驚鸞冶袖時飄韓椽之香飛燕長裾宜結陳  
王之佩雖非圖畫入甘泉而不分言異神仙戲  
陽臺而無別真可謂傾國傾城無對無雙者也  
加以天精開朗逸思彫華妙解文章尤工詩賦  
琉璃硯匣終日隨身翡翠筆牀無時離手清文

滿篋非惟芍藥之花新製連篇寧止蒲萄之樹  
九日登高時有緣情之作萬年公主非無累德  
之辭其佳麗也如彼其才情也如此旣而椒房  
宛轉柘館陰岑絳鶴晨嚴銅螭晝靜三星未夕  
不事懷衾五日猶餘誰能理曲優游少託寂寞  
多閑厭長樂之踈鐘勞中宮之緩箭輕身無力  
怯南陽之擣衣生長深宮笑扶風之織錦雖復  
投壺玉女爲歡盡於百驍爭博齊姬心賞窮於  
六著無怡神於暇景惟屬意於新詩可得代彼



寶蘇微蠲愁疾但往世名篇當今巧製分諸麟  
閣散在鴻都不籍篇章無由披覽於是燃脂瞑  
寫弄墨晨書撰錄艷歌凡爲十卷曾無參於雅  
頌亦靡濫於風人涇渭之間若斯而已於是麗  
以金箱裝之寶軸三臺妙迹龍伸螭屈之書五  
色花牋河北膠東之紙高樓紅粉仍定魯魚之  
文辟惡生香聊防羽陵之蠹雲飛六甲高擅玉  
函鴻烈仙方長推丹枕至如青牛帳裏餘曲旣  
終朱鳥窻前新粧已竟方當開茲縹帙散此綃

繩未對玩於書帷長循環於織手豈如鄧學春  
秋儒者之功難習竇傳黃老金丹之術不成固  
勝西蜀豪家託情窮於魯殿東臺甲館流詠止  
於洞蕭變彼諸姬聊同棄日猗與彤管麗矣香  
奩

碑

司空徐州刺史侯安都德政碑

巖巖大柱大矣周山之峰桓桓地軸壯哉崑崙  
之阜三光懸而不墜九土鎮以無疆承乾合德

之君則天體元之后所以並咨四鎮咸建五臣  
業配蒼祇功成寓縣至於流名雅頌著美風詩  
年代悠然寂寥無紀其能繼茲歌詠者司空侯  
使君乎自文照武穆祚土開家濮水盛其衣簪  
榮波分其緒秩仁義之道夷門美於大梁儒雅  
之風司徒重於強漢自通人許劭託命於江湖  
高士袁忠寄身於交越俱違建安之難獨處衡  
山之陽祖天資秀傑世載雄豪卓富擬於公侯  
班倂必於旌鼓父光祿大夫邑里開通德之門

徐僕射集

卷八

四

州鄉無抗禮之客自茫茫禹迹赫赫宗周家滅  
驪戎國亡夷羿我高祖武皇帝迎河圖於浪泊  
括地象於炎洲南興涿鹿之師北問共工之罪  
天生宰輔堯年致白虎之祥神賜英賢殷帝感  
蒼龍之傑公亦觀時佇聖嘯咤風雲跪開黃石  
之書高詠玄池之野沉吟梁甫自比管仲之才  
惆悵莘郊久負伊生之歎自羯虜侵華群蠻縱  
軼後臯桂部之地四戰五達之郊郡境賢豪將  
謀禦難長者僉論推公主盟義士雄民星羅霧

集公旣膺五聘方啓六韜率是驍徒仍開嶺嶠  
自大討瀟湘同茲樊鄴下軍違命上策不宜敗  
我王師受拘勅盜大陳格于文祖咸秩具神率  
土依風群靈稟朔公亦忠爲令德天纂之謀吳  
帳斯開衛門無擁雖復季孫還魯隨武濟河國  
慶民歡相儔匪若卽授使持節開府儀同三司  
丹陽尹昔光武不尤於馮異穆公深禮於孟明  
終報王官之師遂舉咸陽之地斯乃聖主之宏  
略而名臣之遠圖者焉皇帝以陶唐啓國致玉

版於河宗顓頊承家佐金天於江水經綸草昧  
定鼎之業居多締構權輿斷鼇之功相半固以  
英聲馳於海外信義感於寰中主器攸歸當璧  
斯在公於是抗表長信清宮未央從億兆以同  
心引公卿而定策馳輕軒於軫轔奉侍駕於中  
都七廟之基於焉永固萬邦之本由此克寧乃  
復進司空公南徐州刺史於是鎮之以清靜安  
之以惠和望杏敦耕瞻蒲勸穡室歌千耦家喜  
萬鍾陌上成陰桑中可詠春鷓始嘯必具籠筐

秋蟀載吟競鳴機杼或肅拜靈祀躬瞻舞雩去  
駕擁於風塵還旌阻於飄沐京坻歲積非勞楚  
堰之泉倉廩年豐無用秦渠之水雖復東過小  
縣夏雨逐其輕輪南渡滄江秋濤弭其張蓋固  
不得同年而語矣若夫聽採民訟昏曉必通召  
引軒櫺躬親辨決立受符於前案無留詣於後  
曹接務高城之中非異甘棠之下欣欣美俗濟  
濟都塵以賈琮郭賀之風行建武永平之化於  
是州民散騎常侍王瑒等拜表宮闕請揚茲美

化樹彼高碑民欲天從允彰緣誥銘曰

鬱鬱三象茫茫九州綿天滲沱地處劉赫矣  
高祖爰清國讐元勲佐命力牧風侯亦卽旋歸  
拜家有暉宮亭蠡浦舊翹高飛電巷勅寇風行  
國威文身彼髮作貢來綏我皇纂武攀號東序  
謁渭同周迎門惟呂流矢爲暴撓搶斯舉喋喋  
蒼黎危危刀俎自我徂征妖氛克平爰驅大羗  
實剪長鯨北震巢浦南俘灌城青羗卷介赤狄  
廻兵蹈舞難踰歌謠靡宣曰我黎庶俱祈上玄



山移兩越海變三田公爲上相復倍斯年

廣州刺史歐陽顏德政碑

弱水導其洪源軒臺表其增殖懿哉少府師儲  
皇於二京盛矣司徒傳儒宗於九世廣陵邕邕  
族擅江右渤海赫赫名重洛陽若夫岳鎮龍蟠  
星懸鶉大衡山誕其高德湘水降其清輝千仞  
孤標萬頃無度年當小學志冠成童因孝爲心  
欲仁成體屯騎府君早棄榮祿易簪之曰幾將  
毀終不扶之言深非通制遺貲巨萬富擬猗頓

裁變槐榆並賑宗戚南茨大麓北眺清湘得性  
於橘洲之間披書於杏壇之上三冬文史五經  
縱橫頻致嘉招確乎難拔旣而帝啓黃樞神亡  
赤伏天地崩竇川冢沸騰群悍酋豪更爲禍亂  
朝披羽檄夜炤燿烽浴鐵蔽於山原擬金駭於  
樓堞公疲兵屢出獨據胡牀勅賊重圍尚凭書  
几揚灰旣散駕棒將揮咸剋凶梁以保衡服常  
以二主蒙塵三光掩曜出入逾於嘗膽殷憂獨  
其撫心不治第宅深符去病志梟群醜彌同越

石自禹珪旣錫堯玉已傳物變謳謠風移笙管  
商周之際孤竹尚其哀歌曹劉之間蘇子猶其  
狂哭况番禺連帥寔謂宗枝迷我天機自窺梁  
鼎以公威名本重逼統前軍乾數難違剝象終  
悔高祖未言惟舊彌念奇功卽訓皇家深弘朝  
紀檻車才至輿櫬已焚祝史祓於夷吾壇塲延  
於井伯綢繆安樂造次訐謀爰珥豐貂允光金  
螭但八桂之上蠻夷不賓九疑之陽兵凶歲積  
以公昔在衡臯深留夙愛仁恩可以懷猛獸威

名可以懼啼兒乃授持節散騎常侍衡州刺史  
我皇帝從唐侯以胤國屈啓筮而登家一恭寶  
祚開定江沔三改璇衡苞羅湘峽昔中宗屈申  
於處仲高祖遺恨於平城漢武承基方通沙塞  
晉明紹運裁平姑孰方其盛業綽有光前踐祚  
之初進公位征南將軍廣州刺史又都督東衡  
州二十州諸軍事宜公乃務是民天敦其分地  
火耕水耨彌亘原野賊盜皆偃工賈競臻鬻米  
商鹽盈衢滿肆新垣旣築外戶無扃脂脯豪家

鐘鼎爲樂揚祛酒汗振雨流風市有千金之租  
田多萬箱之詠僧釋慧羨等來朝絳闕備啓丹  
誠乞於大路康莊式刊豐琰庶樊卿寶鼎復述  
台司之功牟叟高碑更紀征南之德於是跪開  
黃素爰登紫泥鑒此誠祈皆如所奏乃詔庸臣  
爲其銘曰

赫赫宗陳桓桓鼎臣千乘建學五典攸因盛德  
斯邈公門日新崇高惟岳睨甫生申去衡移廣  
遷征自鎮攸攸銅界藐藐金鄰莫遠非督無思

不賓三江靡浪五嶺奚塵式歌式舞仁哉至仁  
公其饗福於萬斯春

晉陵太守王勵德政碑

若夫睢陵世傳已祥載德之華徐州先賢亦著  
清風之美偉哉文獻光啓中興郭莖表其深源  
何籌慙其遠慶豈惟桓氏之鳴玉張家之珥貂  
袁姓之朱衣楊宗之華轂又有攸飛遮列班弓  
夾門濯龍俯望緹騎盈道奕世如此何其盛哉  
君以藍田美玉大海明珠灼灼美其聲芳英英

照其符彩丰神雅談識量寬和既有崔琰之鬚  
眉非無鄭玄之腰帶爛爛如高巖下電騷騷著  
長松裹風勢利無擾於胸襟行藏不槩於懷抱  
家門雍睦孝友爲風上友不諂下交不瀆脫貂  
敕厄情靡矜爰釋馬窮途唯濟危殆至於網羅  
圖籍脂粉藝文學侶挹其精微詞宗稱其妙絕  
出爲仁武將軍晉陵太守五雞三隼勤卹有方  
問羊知馬鉤距兼設濟北移樹累政之所未治  
汝南爭水連年之所無斷一朝明決曾不留滯

四民商販咸用殷阜銘曰

康哉寶運美矣良臣渭自澧水源于洛濱公侯  
世及宰輔相因曰我民秀山川降神風情穆穆  
孝友恂恂學則經笥文爲世珍高風遠矣曠代  
難倫鼎鉉虛職台階未臻安知霜霰遽天松椿  
碣石斯表民情旣陳徒然下拜何報陽春

丹陽上庸路碑

在天成象咸池屬於五潢在地成形滄海環於  
四瀆國險者固其金湯儲蓄者因於轉漕貨財



爲禮專俟會通厥田爲上皆資滲漉大矣哉坎  
德之爲用也是以握圖之主財以利民御斗之  
君因之顯教上哉少昊初命水官遯矣高陽爰  
重冥職舜爲太尉於是九澤載疏禹作司空然  
後百川咸導開華山於高掌鑿靈沼於周源莫  
匪神功皆由聖德我大梁之受天明命勞已濟  
民有道稱皇無爲曰帝若夫雲雷草創翦商黜  
夏之勲鑄寶鼎於昆吾安能紀勒陳鴻鐘於豐  
岳豈易揄揚斯固名言之所絕也及乎膺斯寶

運大拯橫流屈至道於汾陽勞凝神於藐射聖  
人作樂簫韶備以九成詰王盡禮春官總於三  
代豈止金門桴竹玉尺調鐘公帶獻明堂之圖  
匡衡建后土之議若斯而已乎天降丹鳥旣序  
孝經河出應龍乃私周易若夫固天將聖垂意  
藝文五色相宣八音繁會不移漏刻纔命口占  
御紙風飛天章海溢皆紫庭黃竹之詞晨露卿  
雲之藻漢之兩帝徒有詠歌魏之三祖空云詩  
賦以爲彭老之教終沒愛河儒墨之宗方難火

宅豈如五詩八會之殊文天上人中之妙典雪  
山羅漢爭造論門驚嶺名僧俱傳經藏香象之  
力持所未勝秋兔之毫書而莫盡忠信爲寶襪  
所免於白駒明德惟馨山川舍於駢犢至如月  
離金虎涅槃染石牛蒼蔚朝興滂沱晚注而清蹕  
纔動纖羅不搖高閑將臨油雲自闕陽鳥馭日  
寧懼武賁之弓飛雨彌天無待期門之蓋震維  
舉德非曰尚年若發居鄴猶莊在漢濤如白馬  
旣礙廣陵之江山曰金牛孰辨梅湖之路專州

典郡青鳧赤馬之舡皇子天孫鳴鳳飛龍之乘  
莫不欣斯利涉玩此脩渠乍擁節而長歌乃樅  
金而鳴籟斯實曠世之奇功無疆之鴻烈者也  
銘曰

后王降德于衆兆民高文象緯妙義幾神業冠  
遷夏功踰八秦時惟大畜象及同人慧雨方霑  
禪枝獨眷帝德惟厚皇恩甚深觀乎禹迹見我  
堯心